



**PRIMEIRU-MINISTRU**

**DISKURSU SUA EXELÉNSIA PRIMEIRU-MINISTRU  
REPÚBLIKA DEMOKRÁTIKA TIMOR-LESTE  
KAY RALA XANANA GUSMÃO  
IHA SIMEIRA ÁZIA ORIENTÁL BA DA-18**

**Jakarta, Indonézia, lora 7 fulan-setembru tinan 2023**

[Simeira Ázia Orientál (EAS) maka hanesan fórum ida ne'ebé halibur líder sira hosi ASEAN no ninia parseiru diálogo ualu: Austrália, Xina, Índia, Japaun, Nova Zelândia, Korea Súl, Rúsia no Estados Unidos].

Obrigadu, Señor Presidente

Vosa Majestade

Distintus Xefes delegasaun ba Simeira Ázia Orientál,

Señora no Señor sira,

Ba dahuluk, ha'u hakarak agradese ba Presidente ASEAN ba konvite hodi partisipa, hanesan observadór, iha Sorumutuk Simeira Ázia Orientál nian ba da-18 ne'e.

Ha'u hato'o parabéns ba dirijentes husi país partisipante sira iha Simeira Ázia Orientál nian ba susesu konvokasaun hosi Simeira ida-ne'e, ne'ebé konstitui fórum ba diálogu ida importante, ne'ebé lidera husi dirijente sira, kona-ba kestoens estratéjikas polítikas no ekonómikas ne'ebé luan ne'ebé sai interese no preokupasaun komún, ho objetivu atu promove pás, estabilidade no prosperidade ekonómika, iha rejiaun ne'e no rejiaun sira seluk.

Ha'u hato'o felisitasaun ba ASEAN tanba hahú ona Simeira Ázia Orientál – plataforma ida ne'ebé importante tebes, ne'ebé halibur potenciál mundiál boot sira, hodi konsentra iha kestaun estratéjika sira ne'ebé afeta ita-nia rejiaun ne'e. Tipu diálogu ida-ne'e importante tebes ba tensaun jeopolítica ne'ebé aumenta no rivalidades entre poténsia sira.

Timor-Leste apoia ASEAN iha arkitetura rejionál ne'ebé nafatin iha evolusaun no, iha konjuntura krítika ida-ne'e bainhira ambiente seguransa globál atuál ne'e labele halo previzaun, ASEAN no ninia mekanizmu sira ne'ebé lidera husi ASEAN, inklui EAS (*East Asia Summit*), continua sai plataformas diálogu no kooperasaun nian ne'ebé efikás.

Timor-Leste hein katak forun ida-ne'e sei kontinua fó dalan ida ba diálogu ida ne'ebé pozitivu ho líder mundiál sira ne'ebé foka iha ita-nia rejiaun, liuliu kona-ba impaktu devastadór (ne'ebé halo aat) husi alterasaun klimátika sira iha ita-nia rejiaun.

Ha'u haksolok haree, iha deliberasaun hotu-hotu husi Vosas Exelénsias, ba manifestasaun ida ne'ebé forte husi kompromisu sira ne'ebé la'o hela hodi apoia sentralidade ASEAN nian ho forma sira ne'ebé konkreta tebes no maneiras hodi mantein papél rejiaun ne'e nian hanesan episentru ba kreximentu globál.

Hanesan membru potenciál ho plenu direitu, kompromisu sira Timor-Leste nian ho ASEAN no ho ninia Estadu Membru sira, nune'e mós ho parseiru sira ASEAN nian iha prosesu integrasaun plena ida-ne'e ba família ASEAN, sei kontinua hametin ita-nia apoio ba sentralidade no unidade iha comunidade ida-ne'e.

Kona-ba ida-ne'e, Timor-Leste hato'o agradesimentu ne'ebé kle'an ba apoio ne'ebé metin tebtebes husi Estadu Membru hotu-hotu ASEAN nian no Parseiru sira husi ASEAN ba ami-nia adezaun. Timor-Leste hein katak bele serbisu hamutuk ho País Partisipante sira iha Simeira Ázia Orientál ne'e, ho objetivu atu sai membru plenu direitu iha futuru.

Ikusliu, ha'u hakarak reafirma katak Timor-Leste partilla valór sira husi nasaun hotu-hotu ne'ebé respeita no defende prinsípiu sira demokrasia no direitus umanus nian, nune'e mós direitu internasionál, bainhira hala'o relasoins internasionais.

Ha'u agradece ba Prezidénsia ba oportunidade boot ida-ne'e.